

TE HUI KI WAITARA.

(P.H.T.)

No te 12 o nga ra o Mei nei ka karangarangatia e Ta A. T. Ngata nga waka o roto i Te Tairawhiti kia kohiritia mai he mangai mo ratou hei haere tahi me ia ki Te Hui a nga Iwi i raro i tenei karangatanga i a Taranaki i pohiri ai i Te Minita Maori, kia hui atu ki te marae i Manukorihi waahi o Waitara, e tika nei kia kiia taua hui he karangatanga na Te Taihauauru i Te Tairawhiti, otira i Te Motu katoa kia hui ki te whakarongo i a ratou kupu mo te ripoata a Nga Komihana na ratou nei i tirotiro te mate o Taranaki mo nga Whenua Rau-patu, i riro he nei i Te Kawanatanga, timata mai i te awa o Waitara tae noa ki te awa o Patea.

Na te nui o te rongo o tenei mate me nga tukinotanga i a ratou i nga ra kua huri ki muri, kua ngaro nei nga a pukorero, nga mana rangatira, nga kai-hautu o nga waka whakateretere i roto i te wa o te pouritanga, koia i te reo whakaoho ki Te Tairawhiti, kori ana te maatua iwi, Te Arawa! Matatua! Horouta! Takitimu! Te Hoe-whaka-te-ngakau rite tonu te whakamau atu te ihu waka ko Taranaki, he tangi he mihi ki te ao tawhito, i-na-rungatia tu i te morehu tangata i te morehu whenua me te taahu kupu i waihotia ake ki Te Ao-tu-roa, he tumanako mo Te Ao-hou me ona Kaupeka-te-whiwhia, te-kore-kore ranei, koiane i tika ai tenei kupu, waimarie ana te whakarongo ki te reo karanga "Haramai! Tatau ka haere ki Waitara kia rongo i te kupu a Te Tai-hauauru mo te rongoa kua whakaaria nei e nga Komihana mo te patunga-he-tanga i a Taranaki me ona whenua!

Kei te mihi kei te 'taikiu' ki Te Kai-hautu o te waka o Te Tairawhiti na ana te maramatanga ka whiti atu i nga tai-papaki-rua o Arai-te-uru, i whakamoca mai i roto o Whanganui-a-rua, ka miria atu i nga pararinga-a-ihu-moana o Parininihi, ko te ra ka whiti nei ki tua o Tawauwau!

Na Matene ka tuiataki nga tira o Te Tairawhiti. No Matatua ko Keepa Tawhio, Tamarau, Rangiaho, No Te Whakatohea ko Anaru Tiweka, No Te Arawa ko Taupopoki, Taiporutu, No Horouta ko Renata Tamepo, Tangiahua, No Takitimu ko Rev. Hakiwai, Paora Kurupo, Nikera, Tomoana. Na te waipuke ka pakaru nga huarahi, ka kore te nuinga o Te Tairawhiti e puta mai. Mehemea i pai, pokia te whemua ki te ki te kawe atu i Te Minita Maori ki Te Taihauauru.

Te taenga ki te marae. Te pohiri wahine, he taua katoa nga kakahu, he tohu tangi ki te aitua i runga i Te Minita me Te Tairawhiti, he tangi ki nga tupuna me te iwi ka ngaro ki te po, me te matua whenua i paru nei i te toto o ratou matua kua ngaro. Te tangata, te marae, te whenua, ano he roimata whakatinana no ratou ma. Ko Taranaki maunga ia purata ana ona mata i a tamanui-te-ra te miramira, ano te rite he